

Regional News Unit AIR Aizawl
Monday, July 29, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoma'n Mizoramin a mamawh hmasa chu inkalpawhna kawng tha zawk leh tam zawk a ni, a ti.
- Ramri buaina chingfel tura beihna kal zelah Mizoram leh Assam sorkar aiawhte chuan August ni 9 hian Aizawl-ah inbiak an tum.
- Tun hnaiah Myanmar atangin raltlan mi 1,500 thelh Mizoram district 5-ah an lo luh belh a, Mizoramah Myanmar raltlan 35,125 an awm mek.
- Paris Olympics 2024-ah Japan-in Gold Medal la tam berin hma a hruai mek a, India chuan Bronze Medal 1 la tawhin 22-na a ni mek.



CM@NITIAYOG

Chief Minister Pu Lalduhoma'n Mizoramin a mamawh hmasa chu inkalpawhna kawng tha zawk leh tam zawk a ni, a ti.

Inrinnia NITI Aayog Governing Council thutkhawm vawi 9-na Prime Minister Narendra Modi-a kaihhruai New Delhi-a buatsaihah he thu hi sawiin Pu Lalduhoma chuan Mizorama kawng awm zat chu ram pum huap dinhmun ngaihtuahin a la tlem hle a ni, a ti a. Mizorama Viksit Bharat 2047 a hlawhtlin theihna tur thil pawimawh hrang hrang a thlen nghal baw.

Chief Minister chuan, NITI Aayog-in State Institution for Transformation of Mizoram atana tanpuina a pek avangin lawmthu a sawi a.

Finance Commission 16-na hnena Mizoram mamawh zualpui an thehluhte chu Viksit Bharat 2047 a hlawhtlin theih na'na thil pawimawh tak tak te an ni, a ti a. Zirna, hriselna, tui, kawlpheha siamchhuah, faina leh inrelbawlina, rotling tur lian tham din kawnga indaih lohna pawh a la nasa niin a sawi a. Mizoram mipui zatve aia tam khawpuia cheng an ni a, khawpui fel fai leh leilung chhiatna laka him, state hmasawna bulthut ni thei neih Mizoramin a mamawh a ni, a ti a. Khawpui leh thingtlang mipuite lâkluh inthlau lutuk tihbo nan te, hna thar tam zawk siam a nih theih na'n te a sorkar chuan 'Handholding Policy' a kalpui dawn thu a sawi a. Hemi atan hian central sawrkarin a bika tanpuina hmangin Mizoram tanpui pui se an duh hle niin a sawi a ni.

Mizoram chuan state dangte aiin hmasawna a kalpui tlai bik tih sawiin Chief Minister chuan, a awmna a kilkhawr avangin ni tin khawsak senso leh hmasawna hnathawhna senso pawh a sang bik, a ti a. Heti chung hian midangte hnunga kal reng ringawt erawh an tum hauh lova; Sustainable Development Goals tihhlawhtlinna lama Mizoram kal chak dan hian state dangte umpha tura sorkar leh mipuite tumruhzia a tilang a ni, a ti.

India hmarchhak state-ahte hian leilung awmdan vang te, hmasawna ruhrel lama an la hniam vang tein Industry lian a tlem a, sum hnar an tlachham bik niin Pu Lalduhoma chuan a sawi a. A bika hmarchhak state-te'n harsatna an lo hmachhawna tur zalen zawka hman theih tur sum leh pai awm thei se an tangkaipui hle ang, a ti a. Ministry tinin an sum ruahman atanga za zela 10 hmarchhak state-te tana an ruahman dan hi inkaihhraina mumal tak duan ni se, chu bakah sorkar laipui hnuaia company-te pawh hian an Corporate Social Responsibility (CSR) sum hi za zela 10 vel tal hi hmarchhak state-ah hmang thei se, tiin a rawtna a thlen bawk a.

Chief Minister chuan, Viksit Bharat tihlawhtling turin remna leh muanna neih a tul hmasa a, Mizoram chu ram dang pahnih karcheh leh a thenawm rama harsatna thleng te vanga chim buai reng a ni a. Venhimna lam kaihhnawihah sum pek ve a nih chiah loh pawhin central sawrkar hian 'Peace dividend' tal Mizoram tan ngaihtuhsak se a duh thu a sawi bawk a ni.

RICE FOR IDPS

Ministry of Home Affairs-in Manipur a chi leh chi intihbuaina avanga Mizorama sahimna zawnga lo kalte tana buhfai pek tura a tih chu buaipui mek a ni.

Home Secretary Pu Vanlalmawia'n a sawi dan chuan, an sahimna zawnga Mizorama raltlan awm zawng zawng tanpuina tur sorkar laipuah dil a nih laiin tuna Cheng vaibelchhe 5 man hu buhfaia tanpuina tur ruahman hi chu Manipur atanga rawn raltlante tan bika Ministry of Home Affairs-in a rawn ruahman a ni a. Ministry of Food and Public Distribution hnenah Cheng vaibelchhe 5 man buhfai pe tura ruahman turin a ti a, hei hi a hranpaa pawisa sanction ngai lova an ngaih thu home secretary chuan a sawi a. Food, Civil Supplies and Consumer Affairs department hotute nena buaipui chhonzawm tur a ni a. A pawisa fai ni lo, a buhfai ang zawnga lo kal tur a nih avangin a phurh dan tur leh thil dang buaipuia ruahmanna siam a ngai dawn niin a sawi bawk.

Tun hnaia Union Home Minister Amit Shah-a'n Chief Minister Pu Lalduhoma hnenah raltlante tanpuina rawn pek a nih tur thu a sawi zulzuiin Ministry of Home Affairs-a Under Secretary, Prem Parkash-a chuan July ni 18 khan office memorandum tichhuakin Union Secretary, Food & Public Distribution hnenah buhfai, Cheng vaibelchhe 5 man pe chhuak turin hriattirna a tichhuak a; a copy hi Mizoram Chief Secretary pawh a rawn thawn a ni.

Puan tawn thin angin nikum May ni 3-a Manipur a chi leh chi intihbuaina avanga Mizorama rawn tlanchhiate tanpuina atan sorkar hmasa khan sorkar laipuah sum a dil thin a. Nikum May ni 16 khan khatih laia Chief Minister Pu Zoramthanga khan Cheng vaibelchhe 5 a dil a, raltlan an pun chak tak em avangin May ni 23 khan Cheng vaibelchhe 10 a dil leh a. Sorkar laipui a ngawih reng hnuah tunah hian buhfai ang zawnga pe turin ruahmanna siam a ni ta a ni.



BORDER TALKS

Ramri buaina chingfel tura beihna kal zelah Mizoram leh Assam sorkar aiawhte chuan August ni 9 hian Aizawl-ah inbiak chhonzawm an tum.

Home Minister Pu K. Sapdanga'n Akashvani Aizawl a hrilh dan chuan Assam sorkarin Mizoram sorkar a rawn bia a, state pahnih aiawhte remchan hun dapin ruahmanna siam a ni a. Assam sorkar palaite hi an Border Protection and Development Minister, Atul Bora-a'n a rawn ho ang a, an state home secretary bakah home department leh a kaihnawih official dangte lo kal tura ngaih a ni a. Pu K. Sapdanga hi home secretary Pu Vanlalmawia leh official dangte'n an tawiawm ang.

Home department hotute'n an sawi dan chuan nikum tawp lam khan Assam palaite hian inbiakna chhonzawm tura Aizawl lo kal an tum a, mahse Mizoram Assembly inthlan a hnaih tawh em avangin lo kal rih lo tura thurâwn pek an ni a. Inthlan hnu kumin February ni 9 khan Chief Minister thar Pu Lalduhoma leh Assam Chief Minister Himanta Biswa Sarmate Guwahati-ah inhmuin Assam Chief Minister hian a aiawh Minister rawn tirh thuai a tum thu a sawi nain Parliament inthlanpuiin a nang chho leh ta si a, inbiak hun hi sawn hlat a ngai leh ta a ni.

Tun tumah hian an inbiak chuan state pahnih Minister an inbiak vawi 4-na tur a ni dawn a. A hma lam hian Aizawlah vawi 2 an inbe tawh a, kum 2022 November thla khan Guwahati-ah an inbe leh a. Khami tuma an inbiaknaa an remtih tlan angin Mizoram sorkar chuan Mizoram chin nia a pawm khaw 62 te a theh lut a. Hei hi ngun taka a hmun ngeia zirchian hnua thehluh a ni. Tun tum inbiaknaah hian hei hi sawi a nih rin a ni.

Chief Minister hlui Pu Zoramthanga leh Himanta Biswa Sarma kha vawi 2 Delhi-a an inbiak bakah Chief Minister thar Pu Lalduhoma leh Assam CM hi an lo inbe tawh bawk a ni.

<><><>

REFUGEES

Tun hnaiah Myanmar atangin raltlan mi 1,500 thelh Mizoram district 5-ah an lo luh belh a, Mizoramah Myanmar raltlan 35,125 an awm mek.

Sorkar hotute hnen atanga thudawn danin Myanmar raltlan lo lut tharte hi Champhai district-ah an tam ber a, mi 1,293 lo luh belh nia chhinchhiah a ni a. Champhai district chhim lam East Tuipui Assembly bial chhunga khawtlang hruaitute chuan vawi khata tam tak lut huk lovin an lo lut deuh reng niin an sawi a. Chin state khawpui Hakha leh Thântlang bawr vela Myanmar sipai leh ‘mipui sipai’ inkahna a nasat leh tak vanga raltlan hi lo pung leh nia ngaih a ni.

Champhai district bakah hian Lawngtlai district-ah mi 108 an rawn luh belh a, Siaha district-ah 77, Serchhip district-ah 14 leh Aizawl district-ah mi pakhat luh belh anga chhinchhiah a ni a. Myanmar raltlan tam berna Champhai district-ah chuan tunah hian raltlan mi 15,505 an awm mek a ni. Hetihlai hian Saitual district-ah chuan Myanmar raltlan awm zat mi 98-in an tlem thung a, mi 293 awm thin kha 195 chauh an awm tawh a. An ramah an kir leh nge hmun dangah an insawn tih hriat a ni lo.

Myanmar raltlan awm mek 35,125 zinga mi 17,004 te hi relief camp 133-ah an awm mek a, a dang mi 18,121-te erawh chuan an chhungte leh thiante an belh bakah in luahin an khawsa nia chhinchhiah a ni. Champhai district-ah hian raltlan tam ber mah se an awmna buk hi 23 chauh a awm a. Relief camp pakhat, Tiau kama Uilui-ah ringawt pawh chhungkaw 200 chuang an khawsa a ni. Chutih lain raltlan kawl tam ber dawttu Siaha district-ah chuan relief camp 41 a awm a, Lawngtlai district-ah 38 awmin, Kolasib, Saitual, Khawzawl leh Serchhip district-ah relief camp a awm lo thung niin sorkar chhinchhiah danah tarlan a ni.

Hetih lai hian sorkarin a chhinchhiah dan hnunung berah chuan Bangladesh-a Chittagong Hill Tracts atanga Lawngtlai district-a raltlan awm zat hi mi 2,014 an ni a. Anni hi Lawngtlai district-ah vek an awm a. Chittagong Hill Tracts-a Zofate awmna biala inhung bikna leh thuneihna sang zawk ngiattu Kuki-Chin National Army (KNA) leh Bangladesh sipaite nasa taka an inkah avanga sahimna zawnga rawn raltlan an ni.

Manipura nikum May ni 3-a chi leh chi intihbuaina avanga an sahimna zawnga Mizorama lo lutte hi an tam vang lai chuan mi 12,000 an kai a, tun dinhmunah chuan district 80-ah mi 4,215 an awm mek niin chhinchhiah a ni.

<><><>

CRYSTAL METH

Inrinni zan khan Champhai district Police leh Assam Rifles tangrualte chuan Tiau kamah Crystal Meth kg 20 leh gram 665 a rit an man.

Inrinni zan dar 11:30 vel khan Myanmar ramri, Tiau luia Vawkte-Kai ah Zokhawthar Police leh Assam Rifles Duty te'n satha ip hmanga thil phur, lui dai kaí lai chu tihdin an tum laiin a thil phurh tlansanin Myanmar lamah a tlanchhia a. A thil phurh an enfiah chuan crystal meth kg 20 leh gram 665 a rit a lo ni.

An thil man hi nimin khan Champhai District Court-ah kalpui a ni a. Narcotic Drugs & Psychotropic Substances Act, 1985 section 22(c) hmangin Zokhawthar Police Station-ah thubuai ziah luh a ni.



PARIS OLYMPICS 2024

Paris Olympics 2024-ah Japan-in hma hruai mekin Gold Medal 4, Silver Medal 2 leh Bronze Medal 1, a vaiin Medal 7 a la tawh a, Medal 6 latu Australia leh Medal 12 la tawhtu USA te'n an dawt a. India chuan Bronze Medal 1 la tawhin 22-na a ni mek.

Nimina meter 10-a hla atanga Air Pistol inkahsiaka India tana Bronze Medal latu Manu Bhaker-i chu President Droupadi Murmu, Vice President Jagdeep Dhankhar leh Prime Minister Narendra Modi-a te'n an lawmpui thu leh an chhuan thu an sawi.

